

**Annertuumik innarluutillit sullivinni illersugaasuni ulluuneranilu  
suliassaqtitsiniarfinni sulinerminni aningaasarsiarisartagaat qanoq  
pitsanngorsarneqarsinnaanersut pillugu apeqquteqaat aallaavigalugu oqallinnissamik  
siunnersuut**

(Inatsisartuni ilaasortaq, Martha Lund Olsen, Siumut)

**Akissuteqaat**

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

Naalakkersuisut apeqquteqaat aallaavigalugu oqallittoqarnissaanik siunnersuummut qujapput.

Inunnut innarluutilinnut suliassaqarfimmut tunngatillugu sullissinerup pitsanngorsarneqarnissaanut Naalakkersuisut kissaatigeqisaannik piviusunngortitsiniarnermi, inuit innarluutillit atugarisaannut, matumani suliassaqtitsinnermut akissarsianut atungassarititaasunut tunngasut assigiinngitsut misissorneqartariaqarput oqallisigineqarlutillu.

Aalajangersakkamut oqaaseqaatini takuneqarsinnaavoq suliassaqtitsinnermut akissarsiaritinneqartoq "*immikkut kaasarfimmiliinertut isigineqassasoq innarluutillip suliassaqtitsiniarnermut kajuminnerulernissaa anguniarlugu*". Aalajangersagaq 1994-iminngaanneersuuvoq, eqqarsaatigineqartariaqarporlu suliassaqtitsinnermi akissarsiaqtitsinnermi taanna siunertaaginnassanersoq. Inuit annertuumik innarluutillit ikiorserneqartarnerat pillugu inatsisiliornermi atuuttumi aalajangiunneqarnikuuvoq, inuit annertuumik innarluutillit sannavimmi suliffeqarfimmiluunniit illersukkani sulippata suliassaqtitsinnermut akissarsiarisassaakunermut 15,00 kr.-iussasoq.

Pingaaruteqarpoq erseqqissaatigissallugu, suliassaqtitsinnermut akissarsiarisassat siusinaartumik pensionisiat pillugit inatsit naapertorlugu inunnut 25 % ataallugu sulisinnaassusilittut nalilersorneqarsimasanut taamaallaat attuumassuteqarmat. Taamaasilluni innuttaasut, annikitsumik sulisinnaassuseqarnertik pissutigalugu nalinginnaasumik suliffeqarnermut ilaasinnaanngitsut pineqarput. 17. marts ukioq manna § 37 naapertorlugu apeqquteqaammut akissuteqaat malillugu, inuit innarluutillit suliffimmik illersugaasumi sulisut suliassaqtitaanermullu akissarsiaqartinneqartut katillugit 270-iupput. Taakkunanga inuit 79-it suliffeqarfimmi sulinerat illersugaavoq. Inuit taakkua tamarmik 25 % ataallugu sulisinnaassuseqarput taamaattumillu siusinaartumik pensionisiaqarnermi qaffasinnerpaamik pisartagaqarput.

Inunnut innarluutilinnut ikiorsiisarneq pillugu inatsisissatut siunnersuutip nutaap piareersarlugu suliarinissaani suliassaqtitaanermi akissarsiat qanoq iluarsiivigineqassanersut aamma misissorneqassaaq.

Taamaattumik inunnut innarluutilinnut nutaamik inatsisiliornermi suliassaqtitsinermik neqeroorutit qanoq ittuuneri qanorlu pitsaatigineri, matumanilu qanoq aningaasarsiaqartoqassanersoq eqqarsaatersuutigineqarput. Suliassaqtitsinermut akissarsiat siunissami nalunaarut aqputigalugu iluarsiivigineqarsinnaanissaat aamma naatsorsuutaavoq. Taamaattumik apeqqut inunnut innarluutilinnut inatsimmik nutaamik suliaqarnerup nalaani qaqilerneqarpat tulluassaaq, suliassaqarfimmi annertuumik ataatsimullu aaqqissuusseqqinnerup oqallisigineqannginneraniunngitsoq.

Naalakkersuisut apeqquteqartoq isumaqatigaat, tassa inuit innarluutillit sulisinnaassusillit inuiaqatigiinni taperseeqataasinnaanerat inunnut ataasiakkaanut inuiaqatigiillu ataatsimut isigalugit assut malunnaateqarsinnaasoq. Suliffeqarfeqarnermi ilaaneq taamaalillunilu inoqatinut attaveqarnissamut inuiaqatigiinnilu ilaatitaanermut periarfissaqarneq taakkuupput inuunermik pitsanngorsaaqataasut. Inuit innarluutillit suliffeqarfeqarnermi ilaasinnaanissaat anguniarlugu pitsaanerpaanik atugassaqtitsisariaqarpugut. Siusinaartumik pensionisiallit pillugit inatsimmi 1. juli 2016-imi atuutilersumi malittarisassat tamanna anguniarsarigaluarpaat. 25 %-iniit annertunerusumik sulisinnaassuseqarluni innarluuteqaraanni siusinaartumik pensionisiat qaffasinnerpaat pisartagarineqarsinnaanngillat, appasinnerulaartumilli pisartagaqartoqarsinnaavoq, sulisinnaassutsip atorluarneqarnissaa taamaalillunilu siusinaartumik pensionisiat aningaasarsianik ilaneqarsinnaanerit siunertarineqarmat.

Pisariaqarpoq erseqqissassallugu inunnut innarluutilinnut atugassarititat pitsanngorsarnissannut apeqqut isumaginninnermi suliassaqarfimmiit annertunerummat. Inunnik innarluutilinnik ilaatitsinerunissamik apeqqummut assersuutigalugu suliffeqarnermi- ilinniartitaanermillu suliassaqarfimmiit aamma suliniuteqartoqarnissaa pisariaqassaaq.

Naalakkersuisut sinnerlugit oqallittoqarluarnissaa kissaatigaara, partiillu qanoq isumaqarnersut tusassallugu qilanaaralugu.